



# Martullo pretenda «one in, two out» – cussegl federal è sceptic

Anc autras intervenziuns s'occupan dal burdi regulativ

■ **(anr/vi) Il cussegl federal recumonda da refusar la moziun da Magdalena Martullo (pps/GR). La cussegliera naziunala pretenda: Per mintga nova lescha èsi da stritgar duas leschas veglias che chaschunan ensemen il dubel dals custs da la lescha nova. Quest «one in, two out» duai distgargiar interpresas.** «Problematic vi da questa moziun è surtut ch'ella cumpiglia explicit era contracts e cunvegnientschas internaziunalas», scriva il cussegl federal en sia resposta da la fin d'avust. Quai chaschunia in impediment substanzial per midadas da dretg che sa resultian per exempel da las cunvegns bilaterals. Igl existia il privel che la Svizra na possa betg pli ademplir sias obligaziuns internaziunalas e ch'ins stuess prender en cumpra dispitas cun ils pli impurtants partenaris da commerzi. Quai engrevgiass l'access a fieras internaziunalas per interpresas svizras u chaschunass malsegirezzas.

Da princip parta il cussegl federal dentant il quità da la moziunaria ch'ins stoppia avoir quità dal plazzal svizzer che na dastga betg perder sia cumpetitivitad. Puncto chargias administrativas stettia la Svizra bain sco cumparegliaziuns da la banca mundiala mussian. Ils ultims onns sajan las grevzzas dentant creschidas.

## Leschas smatgan interpresas

Cussegliera naziunala Martullo aveva inoltrà sia moziun il zercladur. «Per mintga relasch nov che va en vigur ston ins abrogar relaschs vertents che chaschunan il dubel dals custs da regulaziun.» Sco relaschs valian betg mo leschas, mabain era singuls artigels u contracts internaziunalas. Il princip «one in, two out» valia mintgamai per il medem departament: Per in nov relasch en la responsabladad d'in departament stoppian ins abrogar dus vegls relaschs da quest departament.

«Dapi il 1984 crescha il dumber dals relaschs federals mintg'emna per 120 paginas», argumentescha Martullo. L'entschatta 2016 eran en vigur 4900 relaschs d'en tut 69 000 paginas: Passa la mesadad èn contracts internaziunalas e 30 per tschient èn ordinaziuns da l'administraziun.

In studi da l'Unìun da mastergn svizra calculescha ch'ils custs da regulaziun cumportan radund 60 milliardas francs l'onni. Il cussegl federal stimegia ils custs da las pli impurtantas regulaziuns sin 10 milliardas. «Quests custs engrevgeschan las interpresas e restrenschan la cumpetitivitad», scriva Martullo en sia moziun.

La parlamentara grischuna n'è betg la suletta che sa fatschenta cun la materia. En tut datti anc ogt autras intervenziuns che vulan limitar il burdi regulativ. Duas moziuns che pretendan ina calculaziun precisa dals custs da regulaziun ha il parlament approvà.